

CARTA UU JA NI NTEE SAN PABLO APOSTOL NUU NCHIVI ÑUU CORINTO

1 ¹Maá nī cúu Pablo, apóstol Jesucristo, chi súcuán nī jētahān inī Yāā Dios nī ntají yā nduhū jā nacani nī tūhun yā. De ndúū ni jín hermano ō Timoteo té nī carta yáhá cuēē nūū ndá nú hermano ñuū Corinto jā cándíja nú Yāā Dios, jín nūū ndihi ndá nú jā yíhí ndahá Yāā Dios jā íyó nú nī cáhnú Acaya.

²De ñúhún inī ni jā Tatá ó Yāā Dios jín Jētohō ō Jesucristo ná sáhá cā yā jā váha ndá nú de sáhá yā jā coo ndeé coo siī inī nū.

Siqui jā ní ndoho Pablo tūndóhó

³Ná cáhān ō jā cúñáhnú ndasí Yāā Dios, Yāā cúu Tatá maá Jētohō ō Jesucristo. Chi maá yā cúu Tatá ó jā cúndáhví inī yóhó, de níní sáhá yā jā ndúsiī inī ō.

⁴Chi sáhá yā jā ndúsiī inī ō sīquī ndācá tūndóhó jā ndóho ó, tácuá suni cuu sáhá maá ó jā ndusiī inī táhán ó jā ndóho tūndóhó. Chi tá cúu nūū ní nsáhá yā jā ní ndusiī inī maá ó, suni súcuán sáhá ó jā ndúsiī inī jī.

⁵Chi jā ndóho ó cuāhā tūndóhó tá cúu nūū ní ndoho Cristo, suni súcuán níhīn ō cuāhā tūhun ndusiī inī, sáhá Cristo.

⁶Jā ñúcuán, tú ndóho ndá nī tūndóhó, de súcuán de cúu sáhá nī jā ndusiī inī ndá nú de quendōo vāha cā ánō nū. De jā sáhá Yāā Dios jā ndúsiī inī nī, suu sáhá tucu jā ndusiī inī ndá nú, de quendōo vāha cā ánō nū. De súcuán de níhīn nū fuerza jā cuandee inī nū jín ndācá tūndóhó tá cúu nūū ndóho ndá nī.

⁷De ñúhún ndasí inī ni jā cúu ndá nú, chi jín nī jā tá cúu nūū ndóho ndá nú tūndóhó jín nī, suni súcuán ndusiī inī nū jín nī sáhá maá Yāā Dios.

⁸Hermano, cúnī ndá nī jā ná cúnī ndá nú nāsa nī ndoho ndá nī ichi Asia. Chi nī níhīn ndá nī tūndóhó xēen ndasí, jondē ja ñatin nduú cā quenda nī jín, de nī jani inī ni jā cuū nī nícu.

⁹De sīquī jā ní jehndē inī ndá nī jā cuū ndá nī, de ñúcuán nī nsáhá jā ní jīcūhun inī ni jā má cándíja nī maá nī chi nduú tiñu nī, chi sa Yāā Dios jā nástécū ndīyi candíja nī.

¹⁰Chi maá yā nī scácu ndá nduhū nūū tūndóhó xéen jā ja ñatin cuū nī nīcu, de suni súcuan scácu yā nduhū mitan. De ñúhún inī nī jā suni scácu tucu yā nduhū ichi nūū cā.

¹¹De suni chindeé ndá nú ndá nduhū jā cācān táhvī nū jēhē nī. Chi tú cuāhā nchivī cācān táhvī jēhē nī, de suni cuāhā jī cuu nacuetáhvī jēhē nī jā nī nsāhá yā jā váha nduhū.

Jā nī ncucuée Pablo jā quíhīn dē Corinto

¹²Iyó iin jā sáhá jā cúsiī inī ndá nī: Chi nijīn cúu inī ánō nī jā váha ndoo de ndāā nī jica ndá nī nūū nchivī ñayivī, de víhī cā nūū ndá máá nú. Chi sīquī jā váha inī Yāā Dios, de nī nchindeé yā ndá nduhū, de nsūú sīquī jā ndíchí ndá máá nī cúu jā nī jica nī súcuan.

¹³De tūhun jā téē ndá nī nūū ndācá carta nī, chi maá-nī jā cuu cahvi ndá nú de jīcūhun inī nū cúu. De ñúhún inī nī jā jīcūhun váha cā inī nū,

¹⁴tá cúu nūū ja jīcūhun inī nū jacū. De súcuan de cuu cusīī inī ndá nú sīquī ndá nī quivī jā ndijī Jētoho ō Jesús, tá cúu nūū cúsiī inī nī sīquī ndá máá nú.

¹⁵De sīquī jā súcuan nī ncucáhnú inī nī, de jā ñúcuán nī jani inī nī jā tá quíhīn nī Macedonia de xihna cā nūū ndá máá nú cuēē nī, tácuā cusīī inī nū jā cuéndēhé nī ndá nú ūū vuelta nīcu.

¹⁶Chi nī jani inī nī jā cuéndēhé nī ndá nú, sá de yāha nī quíhīn nī Macedonia, de jā ndicó nī Macedonia de nenda tucu nī nūū nū. Ñúcuán de cuu chindeé ndá nú nduhū jā quíhīn nī ichi Judea nīcu.

¹⁷De jā súcuan nī jani inī nī, ¿de á téē jāá nduú nácani váha inī cúu nī jāá nduú nī jēē nī nūū ndá nú? ¿A jāni inī nū jā cúu nī tá cúu nchivī ñayivī jā ñamā cáhān jā cuu, ñúcuán de nduú?

¹⁸Nduú chi maá Yāā Dios jínī yā jāá nduú cáhān nī jín nú jā cuu, de yachī nácāhān nī jā má cūú.

¹⁹Chi nduhū jín Silvano jín Timoteo nī nacani nī tūhun Jesucristo Sēhe Yāā Dios nūū ndá nú. De maá yā nduú cáhān yā jā cuu de nacāhān tucu yā jā má cūú. Chi sa squíncuu yā jā cáhān yā.

²⁰Chi ndihi jā nī nquee yuhú Yāā Dios, squíncuu maá Cristo. De jā suu cúu jā cáhān ō jā viī cúnáhnú Yāā Dios, de cáhān ō Amén, chi ndihi squíncuu Cristo Jesús.

²¹De Yāā Dios cúu jā sáhá jā íní nīhin ndācá ō jín Cristo, de nī nsāhá ndoo yā yóhó jā sáhá ō tiñu jā cúnī yā.

²²De suni nī jēhe yā Espíritu yā jā cundeē inī ánō ō, de cúu yā modo iin sello jā stéhēn jā cúu ō sēhe Yāā Dios. De sáhá Espíritu jā íyó seguro inī ō jā cuāha Yāā Dios táhvī ō.

²³De jāá ncháha ca cuēē ni nūū ndá nú nchivī Corinto, tá cúu nūū ní jani inī ni, suu cúu sīquī jāá nduú ní ncúu inī ni jā cuxeēn ni nūū ndá nú jāá nduú sáhá vāha nú. De maá Yāā Dios cúu jā jínī jā cáhān ndāā ni. De tú nduú cáhān ndāā ni, de íyó vāha jā cuū ni.

²⁴De nsūú jā cúnī ndá nī jā ndacu nīhin nī nūū nū sīquī tūhun jā cándíja nú yā, chi ja íñí nīhin nú jín tūhun yā. Chi sa cúnī ni chindeé nī ndá ndóhó jā ná cúsiī cā inī nū.

2¹Túsaá de nī jani inī ni jā má cuēē ni incā vuelta nūū ndá nú jín tūhun jā cuxeēn ni de cucuécá inī nū sáhá nī.

²Chi tú cucuécá inī nū sáhá nī, ¿de ní nchivī sáhá jā cusiī inī maá nī? Nduú cā nā incā nchivī, chi maá-ni ndá máá nú, de nāsa cúu de tú sáhá nī jā cucuécá inī nū.

³Jā ñúcuán cúu jā ní ntee nī carta ñúcuán nūū nū, tácuá tá cuēē ni de ja nī nacani inī nū sīquī cuāchi nú sáhá, de mā cucuécá inī ni sáhá cuāchi nú quivī jā cuēē ni nūū nū. Chi sa sáhá ndá nú jā cusiī inī ni. De jínī vāha ni jā tú cusiī inī ni, de suni ndihi ndá nú cusiī inī nū.

⁴De jā ní ntee nī carta ñúcuán nūū nū, de ndasí nī nacani inī ni sīquī nū, de nī ntahúhvī inī ni, de jondē jácu nī nī ntee nī. De nduú ní ntée nī jā sáhá nī jā cucuécá inī ndá nú, chi sa jā cunī nū nāsa mānī ndasí nī jín nú.

Jā née cáhnú inī Pablo nūū tēe jā ní nsáhá cuāchi

⁵De jā ní ncucuécá inī ni nī nsáhá tēe jā ní nsáhá cuāchi ñúcuán, de nsūú maá nī-ni, chi saá-ni ndá máá nú nī ncucuécá inī nū jacū nī nsáhá dē. De cáhān ni jā jacū-ni, chi nduú cúnī ni jā cuxeēn ndasí nī.

⁶De jín jā ní ncuxeēn ndá nú nūū dē tá nī ndutútú ndá nú, de jín ñúcuán-ni de nī ncuu-ni.

⁷De mitan chi cúnī jā cune cáhnú inī ndá nú nūū dē, de sáhá nú jā ndusiī inī dē, chi sanaā de caa cā cucuécá inī dē, de mā ndúsiī cā inī dē.

⁸Túsaá de cáhān ndāhvī nī jín ndá nú jā stéhēn tucu nú jā íyó mānī nū jín dē.

⁹Chi jā sīquī tiñu yáhá cúu jā ní ntee nī carta ñúcuán nūū nū, tácuá coto túnī ni ndá nú tú cuetáhvī vāha nú tiñu ndácu nī nūū nū.

¹⁰Túsaá de jā née cáhnú inī ndá nú nūū nchivī, de saá-ni nduhū. Chi jā née cáhnú inī ni nūū nchivī tú nī nsáhá ji cuāchi, de sáhá nī súcuán sīquī jā mānī ni jín nú, jínī jínúū Cristo.

¹¹Chi cánuú jā cune cáhnú inī ō, chi nduú cúnī ō jā nīhīn Satanás cuāchi sīquī ō, chi ja jínī vāha ó nāsa ndúcú stáhvī yóhó jā sáhá ó cuāchi.

Jāá nduú ní íyo nañí inī Pablo inī ñuū Troas

¹²Tá nī jēhēn ni ñuū Troas jā nacani nī tūhun Jētohō ō Cristo, de vāha nī nsáhá yā jā ní íyo modo jā nacani nī tūhun yā.

¹³De vísō sūcuán de nduú ní íyo nañí inī ánō nī, chi nduú ní nánihīn tāhān nī jín hermano ō Tito. Nūcuán de nī nacuetáhvī nī nūū nchivī ñūcuán, de cuānanducú nī dē ichi Macedonia.

Jā sáhá Cristo jā cúndeé ó

¹⁴De ná cútahvī ō nūū Yāā Dios, chi níní ndéca vāha yā yóhó jā cuáhān ō jín Cristo Jesús, de íyó inuú ó jín yā jā cúñáhnú ndasí yā jā snāā yā poder ndihi enemigo. De jétínú yā yóhó jā scútē nuu ó tūhun yā ndācā-nī lugar, tá cúu nūū jítē nuu iin xicō āsīn.

¹⁵De cúu ó tá cúu iin sūja jā jéhēn āsīn nūū Yāā Dios sáhá Cristo. De modo jā quēnda xicō ñūcuán nūū nchivī jā cācu ánō jín nūū nchivī jā tānū tāhvī.

¹⁶Nūū nchivī jā tānū tāhvī, chi cúu ó tá cúu iin xicō jā cuū jī sáhá, de nūū nchivī jā cācu ánō chi cúu ó tá cúu iin xicō vāha jā cutecū jī sáhá. De nī iin ó mā quēndá ó sáhá ó tiñu yáhá de tú mā chíndeé yā yóhó.

¹⁷De ndá nduhū chi nduú sáhá nī tá cúu nūū sáhá cuāhā tēe jā ndúcú dē nīhīn dē xūhún sīquī tūhun Yāā Dios. Chi sa nācani ndaā ndá nī tūhun yā, chi maá Yāā Dios nī ntají nduhū, de maá yā jínī jā nācani ndaā ndá nī sīquī jā cándíja nī Cristo.

Tūhun sīquī contrato jeé

3 ¹De jā cáhān ndá nī sūcuán, ¿de á jáni inī ndá nú jā ndúcú tucu ndá nī cáhān nī jā vāha cā tēe cúu nī, á naá cúu? ¿De á jínī ñúhún jā stéhēn nī carta recomendación nūū ndá nú, á jā cācān nī jā taji nú nūū ndá nī, tá cúu nūū sáhá sava jī?

²Nduú chi ndá máá nú cúu modo iin carta recomendación nī. De suu cúu jā ñúhún inī nī jā ní ncandíja vāha ndá nú nī nsāhá nī, de cúu modo jā yósō tūhun carta ñūcuán inī ánō nī. De ndihi nchivī chi modo jā cáhvi jī cúu jā jínī jī nāsa nī nasāma nú.

³Chi ndá máá nú cúu tá cúu iin carta jā ní ntee Cristo de scāca ndá nī. De nsūú jín tinta ní ntēe yā, chi sa jín Espíritu Yāā Dios, Yāā tēcū. De nsūú nūū tabla yūū tá cúu nūū ní ntee yā ley yā, chi sa nūū ánō nchivī nī ntee yā.

⁴De cáhān ndá nī sūcuán, chi cúcáhnú inī nī Yāā Dios sīquī jā ní nsāhá Cristo.

⁵De nsūú jā jáni inī ndá nī jā cuu quenda maá nī jā sáhá nī tiñu ñūcuán. Chi sa maá Yāā Dios sáhá jā cuu squíncuu nī.

⁶De maá yā nī nsāhá jā cuu satínú vāha nī sīquī contrato jeé yā. De contrato yáhá chi nduú cáhān jā squíncuu ó ley jā ní ntee jín letra, chi sa jā caca ó jín vida jeé, suu jā ní jēhe Espíritu Santo. Chi contrato ley jā yósō jín letra, tánū tāhvī nchivī sáhá. Sochi jā sáhá maá Espíritu cúu jā cutecū ō níí cání.

⁷De tá nī jēhe yā ley nūū Moisés janahán, de nī nchosō letra nūū tabla yūū. De nī jëndūtē ndasí nūū íyó Moisés nī nsāhá yā, de jondē nī jëndūtē ndasí nūū dē. De nduú ní ncúu cūndēhé vāha ndá nchivī Israel nūū dē nī nsāhá. De vísō súcuán de cuéé-ni cuéé-ni nī ndāhvā jā jëndūtē nūū dē. De tú súcuán nī ncuñáhnú ndasí ley jā sáhá jā cuū nchivī de tñnū tāhvī jī,
⁸de sa víhí cā cúñáhnú ndasí cā tūhun jā cutecū ō jā jēhe Espíritu Santo nūū ō.

⁹Chi tú nī ncuñáhnú ndasí ley ñúcuán jā tñnū tāhvī nchivī sáhá, de sa víhí cā cúñáhnú tūhun jā sndáhvā Yāā Dios cuāchi ó.

¹⁰Chi ley ñúcuán jā ní ncuñáhnú jondē saá, nduú cā cúñáhnú cuitī, sīquī jā cúñáhnú ndasí cā tūhun Espíritu jā íyó mitan.

¹¹Chi tú súcuán nī ncuñáhnú ley jā ní iyo jacū-ni tiempo, de sa tūhun jā coo níí cání chi cúñáhnú ndasí cā.

¹²De jā súcuán ñúhún inī ndá nī, jā ñúcuán cúu jā íyó téyíí inī nī jā nácani nī tūhun yáhá.

¹³Chi nduú sáhá ndá nī tá cúu nūū ní nsāhá Moisés jā ní jasī dē iin sahma nūū dē, tácuā mā cūnī ndá nchivī Israel nāsa cuāndahvā jā jëndūtē nūū dē.

¹⁴De nchivī ñúcuán nduú ní jícūhun inī jī. De jondē mitan de tá cáhvi jī tutū contrato ley janahán, suni nduú jícūhun inī jī, chi modo jā ndásī sahma ñúcuán nūū jāá ntúnī jī, de nduú cújiyo cuitī. Chi jondē tá candíja jī Cristo, sá de cujiyo.

¹⁵De suni súcuán jondē mitan tá cáhvi jī tutū ley Moisés, de modo jā ndásī iin sahma nūū jāá ntúnī jī.

¹⁶Sochi jā nácani inī iin nchivī de quīvi jī nūū maá Jētohō ō Cristo, sá de cujiyo-ni jā ndásī ñúcuán.

¹⁷Chi Jētohō ō cúu maá Espíritu. De nūū íyó Espíritu maá Jētohō ō, ñúcuán cúu nūū íyó libre nchivī jāá nduú cā yíhí jī chījin ley janahán.

¹⁸De jā ñúcuán de ndá máá ó chi nduú cā jasī nūū jāá ntúnī ō. Chi cúu ó tá cúu espejo jā jëndūtē, cúu jā stéhēn ō nāsa vii ndasí cúñáhnú maá Jētohō ō, chi jíca ndāā ō. De maá ó ndācá quīvī cuānasāma ó cuānduu vii cā ánō ō tá cúu nūū cáá maá yā. Chi maá Jētohō ō jā cúu yā Espíritu, súcuán sáhá yā jíin ó.

4 ¹Túsaá de nduú núu inī ndá nī jā nácani nī tūhun yā. Chi sīquī jā ní ncundáhvī inī yā ndá nduhū de nī jēhe yā tiñu yáhá nūū nī.

²Chi nduú ndúcú ndá nī ndá modo yuhū jā cúcanoō ō sáhá, de nī nduú jíca nuu nī jíin tūhun ndíchí jā stáhvī, de nī nduú násāma nī tūhun Yāā Dios. Chi sa cáhān ndá nī maá-ni tūhun ndāā. De súcuán de cuu cunī ndācá nchivī inī ánō jī jā cáhān ndāā ndá nī, jíin jínúū Yāā Dios.

³De tú íyó nchivī jāá nduú jícūhun inī tūhun jā scácu yā yóhó jā nácani ndá nī, de súcuán cúu nūū maá-ni nchivī jā tñnū tāhvī.

⁴De jāá nduú cándíja ji, chi maá jānēhén jā ndácu tiñu inī ñayiví yáhá, nī jasī nūū jāá ntúnī ji, tácuā mā jéndūtē tūhun Cristo inī ánō ji, de mā cūnī ji jā vii ndasí cúñáhnú Cristo, Yāā jā inuú cáá jíin Yāā Dios.

⁵De jā nácani ndá nī tūhun, de nsūú tūhun maá nī, chi sa tūhun Jētohō ō Jesucristo nácani nī. De ndá máá nī chi mozo-ni cúu nī nūū ndá nú jā síquī jā mānī ni jíin Jesús.

⁶Chi tá nī nsāhá Yāā Dios ñayiví de nī ncāhān yā jā ná túu luz nūū neē. De suni súcuán nī nsāhá yā jā ní ntūu luz inī ánō ndācá ó, cúu jā jícūhun inī ō síquī Jesucristo, nāsa jéndūtē nūū yā jā vii ndasí cúñáhnú yā tá cúu nūū íyó maá Yāā Dios.

Jā jíca ó jíin tūhun jā cándíja ó yā

⁷De ndācá tūhun yáhá jā vii ndasí cúñáhnú, chi modo jā ñúhún inī iin quīsi ñuhun. Chi cúu ó tá cúu quīsi ñuhun, chi nduú nā fuerza ō. De jā núcuán jíinī vāha ndá nī jā maá Yāā Dios cúu jā jéhe poder síquī tūhun yáhá jā vii ndasí cúñáhnú, de nsūú fuerza maá nī cúu.

⁸De jā núcuán, vísō ndācá lado jíinī ndá nī tūndóhó, sochi nduú sáhá jā má ndúsiī cā inī ni. De vísō cúcuécá inī ndá nī síquī tūndóhó, sochi ñúhún inī ni jā quee vāha tiñu nī.

⁹De vísō jíinī ūhvī nchivī ndá nduhū, de maá yā chi nduú sndóo yā ndá nī. De vísō ndúcú ji snāā ji ndá nduhū jíin tiñu sáhá nī, de mā cūū.

¹⁰De ní-ni cúu nūū cuāhān ni, de tá cúu nūū ní ndoho Jesús jā ní jīhī yā, suni súcuán ndóho ndá nī jā ja ñatin cuū ni, tácuā suni cuu stéhēn ni fuerza Jesús jā técu yā inī yiqui cúñu nī.

¹¹Chi juni técu ndá nī, de ndācá quīvī ja ñatin cahnī nchivī nduhū jā síquī Jesús. De súcuán de jíinī nchivī jā técu Jesús inī yiqui cúñu nī jā cuū.

¹²Túsaá de ndá nduhū, níní cúu jā ja ñatin cuū ni síquī tūhun yā, de núcuán sáhá jā cutecū ndá máá nú níí cání.

¹³De yósō nūū tutū īi: Nī ncandíja nī, de jā núcuán nī ncāhān ni, cáchī. De saá-ni ndá nduhū, suni cándíja nī de suu cúu jā nácani nī tūhun yā.

¹⁴Chi jíinī ndá nī jā maá Yāā jā ní nastécū Jētohō ō Jesús, suni súcuán nastécū yā ndá nduhū, de sáhá yā jā iin cáhnú-ni cuiñi ndihi ó nūū yā.

¹⁵Chi ndācá tūndóhó yáhá ndóho ndá nī tácuā quendōo vāha ndá nú. De súcuán de cāyā cuāhā cā nchivī jā sáhá yā jā vāha ji. Núcuán de suni cuāhā ndasí ji nacuetáhvī ji nūū Yāā Dios, de cuñáhnú cā yā sáhá.

¹⁶Jā núcuán cúu jāá nduú núu inī ndá nī, de vísō cuāndihi fuerza yiqui cúñu nī, de ánō ni chi sa cuānduu fuerza cā ndācá quīvī.

¹⁷Chi tūndóhó jā ndóho ó ñayiví yáhá, nduú-ni xēēn cúu, de ñamā yāha. De sáhá jā nihīn ō iin tāhvī jā cuñáhnú ó níí cání jā cáa ndasí cā nsūú cā tūndóhó núcuán.

¹⁸De nduú sáhá ó cuenta nūū ndācá tūndóhó jā jínī ō nūū mitan, chi sa sáhá ó cuenta nūū ndācá jā váha jāá nduú jínī ō nūū mitan. Chi ndācá jā jínī ō nūū mitan, chi ñamā ndihi, sochi ndācá jāá nduú jínī ō nūū, chi coo níí cání.

5 ¹Chi yiqui cúñu ó jā ndéē ō ñayiví yáhá, cúu tá cúu iin vehe jā naā. De jínī ō jā tá naā, de cuāha Yāa Dios iin yiqui cúñu jeé, de suu cúu tá cúu iin vehe jā coo níí cání jondē andiví. De nsūú iin vehe jā sáhá nchiví cúu, chi jā sáhá Yāa Dios cúu.

²De juni ndéē ō vehe yáhá jā cúu yiqui cúñu ó, chi jéca inī ō sáhá, chi ndasí cúnī ō jā nūcūhun ó yiqui cúñu jeé ó jondē andiví.

³Chi tá nūcūhun ó ñúcuán, de mā cōó maá-ni cā ánō ō jā naā yiqui cúñu ó yáhá.

⁴Chi juni íyó cā ō inī vehe yiqui cúñu ó yáhá, de jéca inī ō de cúcuécá inī ō. De nsūú jā cúnī ō jā sndóo ó yiqui cúñu ó de coo maá-ni ánō ō. Chi sa cúnī ō jā nūcūhun ó jā jeé, tácuā ndāhvā yiqui cúñu ó jā naā, de coo maá jā cutecū níí cání.

⁵De Yāa Dios cúu jā ní nsāhá jā súcuán coo ó. De nī jēhe yā Espíritu Santo jā ndéē inī ánō ō, de sáhá maá Espíritu jā íyó seguro inī ō jā cuāha Yāa Dios tāhvī ō.

⁶Túsaá de níní cúu jā cúndeé cúcáhnú inī ndá nī. Chi jínī nī jā juni ndéē nī chījin yiqui cúñu nī yáhá, de jícá íyó nī jín maá Jētohō ō.

⁷Sochi mitan chi cándíja ndá nī jā íyó yā jín nī, vísō ncháha ca cunī nī nūū yā.

⁸De cúndeé cúcáhnú inī ndá nī, chi sáhá nī cuenta jā vāha cā tú ná quée nī chījin yiqui cúñu nī yáhá de quīhīn nī cundeē nī jín maá Jētohō ō.

⁹Jā ñúcuán cúu jā ndúcú ndéē nī sáhá nī jā cusī inī yā jín nī, vísō tú íyó cā nī chījin yiqui cúñu nī á vísō tú cundeē nī jín yā.

¹⁰Chi cánuú jā ndihi ó cuiñi yuhú mesa Cristo jā sáhá ndāā yā tiñu ó. De tá iin iin ó nīhīn ō sīquī nāsa nī nsāhá ó, á jā váha á jā nēhén, tá nī iyo ó chījin yiqui cúñu ó.

Siqui jā ndivi ó nūū tūhun jā mānī Yāa Dios jín ó

¹¹Túsaá de ndíhvī inī nī jā má stívī nī nūū maá Jētohō ō, de jā ñúcuán ndúcú ndéē nī scándíja nī nchiví. Sochi jínī Yāa Dios jā íyó ndāā ndá nī, de ñúhún inī nī jā suni súcuán jínī ndá nú.

¹²De nsūú jā ndúcú tucu nī cāhān nī jā vāha cā tēe cúu ndá nī. Sochi cáchī tūhun nī jā cuu cusī inī ndá nú jā síquī nī. De súcuán de cuu scócóo nú nūū nchiví jā cútéyí jī sīquī nāsa cáá nchiví, de nduú sáhá jī cuenta nāsa cáá ánō nchiví.

¹³De va sanaā de jáni inī ndá nú jā tēe loco cúu ndá nī jā cáhān ni sūcuán. De sīquī jā ndāhvī inī ni jēhē Yāā Dios cúu. De nduú chi íyó vāha xīnī ni, de jā ñúcuán jétíñú yā ndá nī jā quendōo vāha ndá nú.

¹⁴Chi sīquī jā cundāhvī inī Cristo ndá nduhū, jā ñúcuán cúu jā cánuú nacani nī tūhun yā. Chi jínī vāha ndá nī jā ní jīhī mátúhún-ni yā jā sīquī ndihi ó, de jā ñúcuán cúu modo jā ní jīhī ndihi ó jín yā.

¹⁵Chi nī jīhī yā jā sīquī ndihi ó tácuā ndācá ó jā tēcū, mā cútecū cā ō jā sāhá ó jā cúnī maá ó, chi sa jā cúnī maá yā jā ní jīhī yā de nī natecū yā jā sīquī ō.

¹⁶Jā ñúcuán nduú cā sāhá ndá nī cuenta nāsa-ni cáā nchivī, tá cúu nū sāhá nchivī ñayivī. De vísō sūcuán nī nsāhá nī cuenta Cristo jondē saá, jā iin tēe-ni cúu yā, de mitan chi nduú cā jáni inī ni sūcuán.

¹⁷Chi tú iin nchivī yíhī ji ndahá Cristo, de ja nī ndujeé ji. De ndācá modo nēhén ji, ja nī nchāha cuāhān, de mitan de ja nī ndujeé ndihi.

¹⁸De Yāā Dios cúu jā sāhá ndihi yāhá, chi jín Cristo nī nsāhá yā jā ní ndīvi ndācá ó nū tūhun jā mānī yā jín ó. De nī ntetíñú yā ndá nī jā nācani nī tūhun jā ndīvi nchivī nū tūhun jā mānī yā jín ji.

¹⁹Chi jín Cristo de nī nsāhá Yāā Dios jā nchivī ñayivī ndīvi ji nū tūhun jā mānī yā jín ji. De nduú nācunehen yā cuāchi jā ní nsāhá nchivī. De nī ntetíñú yā ndá nī jā nācani nī tūhun yāhá nāsa ndīvi ji nū tūhun jā mānī yā jín ji.

²⁰Túsaá de cúu ndá nī tēe jā jīca tiñu maá Cristo. De jā cáhān ni, chi modo jā maá Yāā Dios cáhān ndāhvī yā jín ndá nú. Túsaá de cáhān ndāhvī nī jín ndá nú jā cáhān Cristo, jā ná ndīvi ndá nú nū tūhun jā mānī Yāā Dios jín nú.

²¹De Cristo, vísō nduú ni iin cuāchi yā, de nī nsāhá Yāā Dios jā ní nūcundēe cuāchi ó sīquī yā. De sūcuán de yóhó jā yíhī ndahá Cristo, nī nūcundēe sīquī ō jā íyó ndāā ō tá cúu nū íyó ndāā Yāā Dios.

6 ¹Túsaá de sīquī jā cúu ndá nī tēe jā sátíñú jín yā, de cáhān ndāhvī nī jín ndá nú jā má sndóo uun nú tūhun jā ní nsāhá Yāā Dios jā vāha ndá nú.

²Chi cáchī yā nū tutū īi:

Maá tiempo jā cúnī maá nī de cunini nī tūhun jā cáhān ndāhvī nú jín nī.

De maá tiempo jā scácu nī nchivī, de scácu nī ndóhó.

Cáchī yā. De mitan-ni cúu maá tiempo jā cúnī yā, de mitan-ni cúu tiempo jā ní nquiji Yāā jā scácu yóhó.

³De ndúcú ndá nī jā má sāhá nī ni iin tiñu jā casī jā candíja nchivī, tácuā mā cáhān ji sīquī tiñu ndíso nī.

⁴Chi sa ndúcú nī jā ndihi jā sáhá nī stéhēn jā cúu nī tēe jā sátíñú nū Yāa Dios. Jā ñúcuán jéndeé inī ndá nī jā ndóho nī tündóhó, jíin jā cúmanī nū nī, jíin jā víjín sáhá jíin nī.

⁵Chi nī iyo quéhén vuelta jā ní ncani nchivī ndá nī, de nī nenda ji sīquī ndá nī, de nī nchihi ji ndá nī vecāa, de nī nsatíñú nīhin nī, de nī jahnī nī maá nī māhná, de nī iyo nditē inī nī.

⁶De suni ndúcú ndá nī jā cuetúhún ji nduhū sīquī jā ndāa jíca nī, de jícūhun vāha inī nī tūhun ndāa, de íyó paciencia inī nī, de vāha inī nī, de ndéē Espíritu Santo inī ndá nī, de cúndáhvī ndija inī nī táhán nī.

⁷De nácani ndāa ndá nī tūhun, de poder Yāa Dios íyó jíin nī. De jíin tūhun ndāa sndáhvā nī ndācá tiñu néhén, chi modo jā cánāa nī sīquī. De modo jā nénda ñúcuán sīquī ndá nī, de nénda ndá nī sīquī.

⁸Iyó vuelta jā íyó yíñúhún nchivī jíin nī, de íyó vuelta jāá nduú. Iyó vuelta jā jétúhún ji ndá nī, de íyó vuelta jā cáhān ji sīquī nī. De íyó vuelta jā cáhān ji jā tēe stáhvī cúu ndá nī, de íyó vuelta jā cáhān ji jā tēe ndāa cúu nī.

⁹De íyó vuelta jā sáhá ji jāá nduú jíin ji ndá nī, de íyó vuelta jā sáhá ji jā jíin vāha ji ndá nī. De íyó vuelta jā cúni nchivī jā cahnī ji ndá nī, sochi técu cā nī. De vísō sndóho ji ndá nī, sochi nduú jíhī ndá nī.

¹⁰De vísō íyó jā cúcuécá inī nī, sochi níní cúsi inī nī. De vísō tēe ndáhvī cúu ndá nī, sochi sáhá cuícá nī cuāhā nchivī jíin tūhun yā. De vísō nduú nā cuá névāha nī, sochi jíin maá yā de ndihi-ni névāha nī.

¹¹Hermano ñū Corinto, súcuán cúu jā cáhān cājí nī jíin ndá nú, chi sīquī jā mānī nī jíin nú, jā ñúcuán cúu jā cáhī ndihi nī nāsa ndóho nī.

¹²Ndá máa nī cáhī cājí nī sīquī jā mānī ndasí nī jíin ndá nú, de ndá máa nú sanaā de nduú mānī nū jíin nī súcuán.

¹³De modo jā cáhān tatá jíin sēhe, suni súcuán cáhān ndáhvī nī jíin ndá nú jā coo manī nū jíin nī, tá cúu nū íyó mānī nī jíin nú.

Siquī jā cúu ó templo Yāa Dios

¹⁴Mā quívi nduū ndá nú jíin tiñu néhén jā sáhá nchivī jāá nduú cándíja, chi mā cúu coo inuú nú jíin ji. ¿Chi nāsa cúu quetáhán tiñu jā sáhá nchivī ndāa jíin jā sáhá nchivī néhén? ¿De nāsa cuu cundeē inuú nchivī jíca jíin luz yā jíin nchivī jíca nū neē?

¹⁵¿Nāsa cuu coo inuú Cristo jíin Satanás? ¿De nāsa cuu cuiñi cáhnú nchivī cándíja jíin nchivī jāá nduú cándíja?

¹⁶¿De nāsa cuu canī táhán templo Yāa Dios jíin ídolo? Chi ndá máa nú cúu templo Yāa Dios, Yāa técu, chi ndéē yā inī ánō nū, tá cúu nū ní ncāhān yā:

Cundeē ni inī ndá ji de caca nuu nī māhñú ji,
de cuu nī Yāa Dios maá ji,
de cuu ji nchivī maá nī.

Ncachī yā.

¹⁷De jā ñúcuán nī ncāhān cā yā:

Mā quívi nduū ndá nú jín tiñu néhén jā sáhá ndá ji,

chi sáhá sín nú maá nú, cáchī Jētohō ō.

De mā tīn nú ndācá jāá nduú ndāā.

Ñúcuán de naquehen nī ndá nú,

¹⁸de cuu nī Tatá ndá nú,

de cuu nú sēhe yíi nī jín sēhe síhí nī,

cáchī Jētohō ō, Yāā jā tīn ndihi poder.

Cáchī tutū.

7 ¹Ñanī mánī, túsaá de névāha ó ndācá tūhun yáhá jā ní nquee yuhú yā jā sáhá yā. Jā ñúcuán ná sáhá ndoo ó maá ó ndācá jā sátéhén yiqui cúñu ó jín ánō ō. De ná cúndihvī inī ō jā má stíví ó nū Yāā Dios, de ná cóo ndoo coo iī ō nū yā jín ndihi tiñu jā cúnī yā.

Jā ní nacani inī nchivī Corinto sīquī cuáchi ji

²Coo manī ndá nú jín ndá nī viī. Chi nduú ní nsáhá nī falta nū ni iin nú, de nduú ní stíví nī ánō ni iin nú, de ni iin nú nduú ní stáhví nī.

³De nsūú jā ndúcú nī cāhān ni nū nū cúu jā cāhān ni súcuan, chi ja nī ncāhān ni jā mānī ndasí nī jín nú. De níní ñúhún inī ni ndá nú, vísō cuū ō á cutecū ō.

⁴De cúcáhnú ndasí inī ni ndá nú, de cúsiī ndasí inī ni jā jíca ndāā nū. De vísō jínī ndá nī ndācá tūndóhó yáhá, de íyó ndeé inī ni de cúsiī ndasí inī ni jā sīquī ndá nú.

⁵Tá nī jēē ndá nī Macedonia, de nduú ní íyo nañí inī ni, chi sa vījín nī íyo tūndóhó jín nī ndācá lado. Chi nī íyo jā ní stáhān tāhān jín nī, de nī nchūhú nī jā sanaā de caca yátá nchivī cándíja.

⁶De Yāā Dios jā sáhá jā ndúndeé inī nchivī jā cúcuécá inī, nī nsáhá yā jā ní ndundeé inī ndá nī, chi nī nquiji Tito nī nsáhá yā.

⁷De nī ndusiī inī ndá nī, de nsūú maá-ni sīquī jā ní nquiji dē, chi suni jā ní ndundeé inī dē nī nsáhá ndá nú. Chi nī ncachī tūhun dē jā ñúhún inī ndá nú jā cunī tucu nú nū ni, jín jā cúcuécá inī nū sīquī cuáchi nú, jín jā nácani inī nū jēhē ni. De jā ñúcuán víhí cā nī ncusiī inī ni.

⁸De carta jā ní ntají nī nū ndá nú, vísō nī nsáhá jā ní ncucuécá inī ndá nú, sochi nduú cā nácani cuécá inī maá nī jā ní nsáhá súcuan. Chi vísō nī ncucuécá inī ni saá, de mitan de nduú cā, chi jínī ni jā jacū-ni quívi nī ncucuécá inī ndá nú nī nsáhá.

⁹De mitan de cúsiī inī ni, de nsūú sīquī jā ní ncucuécá inī ndá nú, chi sa sīquī jā ní jetíñú jā ní ncucuécá inī nū, chi nī nsáhá jā ní nacani inī nū sīquī

cuáchi nú. Chi nī ncucuécá inī nū tá cúu nū cúnī maá Yāa Dios, de nsūú jā ní nsāhá ūhvī ni ndá nú.

¹⁰Chi tú cúcuécá inī ō tá cúu nū cúnī Yāa Dios, de suu sáhá jā nácani inī ō sīquī cuáchi ó de scácu yā yóhó, de sá de nduú cā nácani cuécá inī ō. Sochi tú cúcuécá inī nchivī jāá nduú cándíja, de nduú jétíñú jā nacani inī ji, chi sa tñhū tñhvī ji.

¹¹Sochi nī ncucuécá inī ndá nú tá cúu nū cúnī Yāa Dios, de mitan de jínī ndá nú nāsa vāha nī jetíñú. Chi nī nacani ndasí inī nū nī nsāhá, de nī nducú ndá nú jā quendōo ndāa nū, de nī ncuxeēn nū nū tēe jā ní nsāhá cuāchi, chi nī nchūhú nú jā ní stíví nú nū yā. Nūcuán de ndasí nī ncuu inī ndá nú jā cunī tucu nú nū ni, de nī ndihvī ndasí inī nū nī ncuxeēn nū nū tēe jā ní nsāhá cuāchi nūcuán. De súcuán nī stéhēn ndá nú jāá nduú cuāchi nú, chi nduú ní jétúhún ndá nú cuāchi jā ní nsāhá tēe nūcuán.

¹²De jā ní ntee nī carta nūcuán, de nsūú maá-ni sīquī tēe jā ní nsāhá cuāchi, de ni nsūú maá-ni jēhē tēe jā ní ndoho nī nsāhá dē. Chi sa nī ntee nī tácuā sáhá ndá nú cuenta nāsa nī nacani ndasí inī nū jā mānī nū jín nī, jínī jínū Yāa Dios.

¹³Jā nūcuán nī ndusiī inī ndá nī jā sīquī ndá nú. De víhí cā nī ncusiī inī ni jā ní jinī ni jā cúsiī inī Tito, chi nī nduu nañí inī dē nī nsāhá ndá nú.

¹⁴Chi ja nī ncāhān ni jín dē jā cúsiī inī ni jā vāha nchivī cúu ndá nú, de mitan de nduú ní nquéndōo nī tūhun canoō jā sīquī nū. Chi tá cúu nū ní jinī ndá nú jā íyó ndāa ndācá tūhun jā ní ncāhān ni jín nú, suni súcuán nī nquee ndāa jā ní ncāhān ni jín Tito jā cúsiī inī ni sīquī nū jā vāha squíncuu nú.

¹⁵De víhí cā mānī dē jín ndá nú mitan jā nūhún inī dē jā vāha nī jetáhvī nú jā cáhān dē, de nī iyo yíñhún nú chi nī ndihvī inī nū jā má stíví nú nū dē.

¹⁶Túsaá de cúsiī inī ni sīquī jā cúcáhnú ndasí inī ni ndá nú.

Jā ná cúsiī inī ji sōcō ji cuāhā

8¹Hermano, mitan de suni cúnī ndá nī cachī tūhun nī nū ndá nú nāsa cuāhā jā vāha nī nsāhá Yāa Dios jín nchivī cándíja jā íyó región Macedonia.

²Chi vísō nī jito túnī ndasí tūndóhó ji, de suni nī ncusiī ndasí inī ji jín tūhun yā. De vísō ndóho ndáhvī ndasí ji, de vāha ndasí nī jaquín ji cuāhā xūhún jā cuu nchivī cándíja.

³Chi cúu nī testigo jā ní ncusiī inī maá ji nī jēhe ji nāsaa nī nquenda ji, de jondē víhí cā nī jēhe ji.

⁴Chi nī ncāhān ndáhvī ndasí ji jín nī jā cuāha nī tūhun jā chindeé táhán ji jín ó cuāha ji xūhún cuu ndá hermano jā ndóho ndáhvī.

⁵De víhí cā nī nsāhá ji nsūú cā tá nī jani inī ndá nī, chi xihna cā nī nsōcō ji maá ji nūū Jētohō ō, de sá de nī jēhe ji maá ji jā sāhá ji ndācá jā cúnī ndá nī, ndihi nāsa jétahān inī Yāā Dios.

⁶De jā súcuán nī nsāhá ndá nchivī Macedonia, de nī sndíhvī inī ndá nī Tito jā ná cuéē tucu dē nūū ndá máá nú, de sāhá dē jā jīnu tiñu jā ní squíjéhé dē jíín nú jā suni caquīn nū cuāhā xūhún cuu nchivī ndāhvī.

⁷Chi ndá ndóhó vāha ndasí sáhá nú ndācá-ni, chi vāha cándíja nú, vāha nācani nú tūhun, vāha jícūhun inī nū, vāha ndíhvī inī nū, vāha mānī nū jíín ndá nī. Túsaá de suni cánuú jā vāha sāhá nú tiñu yáhá jā cuāha nú jā cuu nchivī ndāhvī.

⁸De nsūú jā cúnī ni ndacu nī nūū nū, chi sa cáchī tūhun nī nūū nū nāsa cúsiī ndasí inī sava cā nchivī jēhe ji xūhún, de súcuán de cunī ni jā suni cúndāhvī ndija inī ndá máá nú nchivī ndāhvī.

⁹Chi ja jíín ndá nú nāsa vāha ndasí inī Jētohō ō Jesucristo jíín ó. Chi sīquī jā ní ncundāhvī inī yā ndóhó de nī nasāhá ndāhvī yā maá yā, vísō cuícá ndasí yā jondē andiví nícu. De súcuán nī nsāhá yā jā cúcuícá ndá nú ndihi jā ndíso tūhun yā, sīquī jā ní nasāhá ndāhvī yā maá yā.

¹⁰De jā vāha ndá máá nú cúu jā ná cáchī ni nāsa jáni inī ni sīquī tiñu yáhá. Vāha nī nquijéhé ndá nú cuiyā ava, chi nsūú maá-ni jā ní jaquīn nū xūhún, chi suni nī ncusiī ndasí inī nū nī nsāhá nú.

¹¹Túsaá de mitan de sínu ndá nú da. De tá cúu nūū ní ncusiī inī nū jā ní nquijéhé nú jíín, suni súcuán cusii inī nū sínu nú, chi cuāha ndá nú tú nāsa névāha nú.

¹²Chi tú cúsiī inī ō cuāha ó, de jétāhvī yā tú nāsa névāha ó, chi nduú jícān yā jā cuāha ó jāá nduú névāha ó.

¹³De nsūú jā cáhān ni jā cahnī ndāhvī nú maá nú jā caa cā nīhīn ji nsūú cā jā ndōo nūū ndá máá nú.

¹⁴Chi sa jā inuú-ni cunevāha ndá nú jíín ji. Chi névāha cuāhā nū mitan, de cuu cuāha nú jā cúmanī nūū ndá ji. Núcuán de tú ní iin quivī cunevāha ndá ji, de suni cuu taji ji de tú cúmanī nūū nū. De súcuán de inuú-ni cunevāha ndá nú,

¹⁵tá cúu nūū cáhān tutū īi sīquī nchivī jā ní nastútú maná jondē janahán: Tēe jā ní nastútú cuāhā, chi nduú ní ndóo cā. De tēe jā ní nastútú jacū-ni, suni nduú ní ncúmanī nūū dē. Cáchī tutū.

Tūhun Tito jíín ūū cā táhān dē

¹⁶De ná cútahvī ni nūū Yāā Dios jā ní nsāhá yā jā ndíhvī inī Tito jēhē ndá nú tá cúu nūū ndíhvī inī ndá máá nī.

¹⁷Chi nī jetāhvī dē jā ní ncāhān ni jíín dē jā cuéē dē nūū nū. De sīquī jā ndíhvī inī dē jēhē ndá nú, jā núcuán cúu jā cuéē dē, chi súcuán cúu inī maá dē.

¹⁸De suni tají ndá nī iin hermano cuēē jíin Tito nūū nū. De ndācá grupo nchivī cándíja jétuhún ji tēe ñúcuán jā vāha sātínú dē sīquī tūhun jā scácu yā yóhó.

¹⁹De ndācá grupo nchivī cándíja suni nī ntee ji tiñu dē jā quíhīn dē jíin ndá nī chindee dē jā quisiáha ndá nī xūhún jā ní jēhe nchivī. De tiñu yáhá sáhá ndá nī tácuā cāhān nchivī jā vāha ndasí Yāā cúu maá Jētohō ō, chi cunī ji nāsa cúsiī ndasí inī nū jā sócō nū xūhún.

²⁰De quíhīn ni jíin ndá tēe ñúcuán tácuā ni iin nchivī mā tēē ji cuāchi sīquī ni sīquī xūhún jā ní nsōcō nchivī.

²¹Chi ndúcú nī jā ndāā squíncuu nī ndācá tiñu, de nsūú maá-ni nūū Yāā Dios, chi saá-ni nūū nchivī.

²²De suni tají ndá nī incā hermano ō cuēē dē jíin ndúū tēe yáhá. De ja ncuu quéhén vuelta nī stéhēn dē jā cúsiī ndasí inī dē jā ndíhvī inī dē ndācá tiñu. De mitan chi ndíhvī cā inī dē jēhē ndá nú, chi cúcáhnú ndasí inī dē jā squíncuu nú.

²³De tú jíicān tūhún nchivī sīquī Tito, de cachī nū jā cúu dē tēe chindee nduhū jā sātínú dē jíin nī nūū nū jā sīquī tūhun yā. De ndúū cā hermano ō yáhá, cachī nū jā cúu dē tēe jā ní ntetínú nchivī cándíja, de íyó yíñúhún dē nūū Cristo.

²⁴Túsaá de stéhēn nū nūū dē jā íyó mānī ndija ndá nú jíin dē, tácuā cunī ndācá grupo nchivī cándíja. De súcuán de cunī ji jāá nduú ní ncúsiī cāhá inī ni jā sīquī ndá nú.

Sīquī jā jáquīn ji xūhún cuu ndá hermano

9 ¹De mitan de nduú cā jíinī ñúhún jā tee nī nūū ndá nú sīquī xūhún jā jáquīn nū jā cuu ndá hermano jā ndóho ndáhvī.

²Chi ja jíinī ni jā jétahān inī ndá nú cuāha nú. De jā ñúcuán maá-ni jā cúsiī inī ni cāhān ni jíin nchivī Macedonia jā ndá ndóhó nchivī Acaya, ja nī nsāhá tūha nú xūhún cuīyā ava. De jā súcuán nī ncusiī inī ndá máá nú, de jā ñúcuán cuāhā nchivī Macedonia suni nī ndíhvī inī ji nī jēhe maá ji.

³De tají nī ndinúnī hermano yáhá, cuēē ndá dē nūū nū xihna cā, tácuā tá cuēē maá nī de mā cāhān nchivī jā ní stáhvī nī jā ní ncāhān ni jā squíncuu vāha nú jíin tiñu ñúcuán. Chi coo tūha ndija nú jíin xūhún tá cúu nūū ní ncāhān ni jíin ji.

⁴Chi sanaā de cuēē ni jíin jacū tēe Macedonia, de tú cunī dē jāá nduú íyó tūha ndá nú, de nīhīn ni tūhun canoō, de saá-ni ndá máá nú, chi nī ncāhān téyíí nī jā íyó tūha ndija nú.

⁵Jā ñúcuán nī jani inī ni jā cánuú jā cāhān ni jíin ndācá hermano yáhá jā cuēē ndá dē xihna cā, de sá de cuēē ni, tácuā sndíhvī inī dē ndá nú jā ñamā

ná cóo tūha xūhún jā ní ncāhān nū jā cuāha nú. De súcuan de coo tūha sīquī jā váha inī ndá nú, de nsūú jā ní nsáhá fuerza ni ndóhó.

⁶De nūcūhun inī ndá nú tūhun yáhá jā tú jacū-ni cuāha nú de suni jacū-ni nanihīn nū: Chi tēe jā jáquīn tāmá, suni tāmá-ni nástútú dē. De tēe jā jáquīn cuāhā, chi suni cuāhā nástútú dē. Cáchī tutū.

⁷Tá iin iin nú cuāha nú nāsaa nī nchuhun inī maá nú. Mā cúxii inī nū cuāha nú, chi nsūú fuerza cúu. Chi Yāa Dios mānī yā jíin nchivī jā cúsiī inī cuāha.

⁸De maá Yāa Dios cuu sáhá yā jā nducuahā ndācá nū jā váha jā cuu ndá nú, tácuā níní cunevāha nú ndācá ndihi jā jíni ñúhún nú, de coo sobra cā jā cuāha nú cuu ndācá tiñu váha.

⁹Chi súcuan cáhān tutū īī sīquī ndá nchivī jā jēhe:

Nī scáa ji nī jēhe ji nūū nchivī ndāhvī.

De ndācá tiñu váha jā sáhá ji chi quendōo níí cání.

Cáchī tutū.

¹⁰De Yāa Dios jēhe yā tatā nūū tēe jáquīn, de níhīn dē stāa yáji dē. De suni súcuan cuāha yā ndinuū nūū jā váha cuu ndá nú, de sáhá yā jā cāyā de nducuahā tiñu váha jā sáhá ndá nú.

¹¹Súcuan de coo cuícá nú jíin ndācá-ni, tácuā cuu cuāha cuāhā nū. De xūhún jā cuāha nú jā quīhīn nūū ndá hermano jā ndóho ndāhvī, suu sáhá jā nacuetáhvī ji nūū Yāa Dios.

¹²Chi xūhún jā cuāha ndá nú nūū ji, nsūú mātúhún-ni jā nīhīn ji jā cúmanī nūū ji, chi suni sáhá jā nacuetáhvī ndasí ji nūū yā.

¹³De cāhān ji jā vāha ndasí Yāa cúu Yāa Dios, chi xūhún jā jēhe ndá nú stéhēn jā vāha cándíja nú tūhun Cristo. De suni sáhá jā cāhān ji jā cúñáhnú ndasí Yāa Dios sīquī jā vāha nī jēhe ndá nú nūū ji jíin nūū ndá cā nchivī.

¹⁴De suni cācān táhvī ji jēhē nū, chi coo manī ndasí ji jíin nú sīquī jā vāha ndasí nī nsáhá Yāa Dios jíin nú.

¹⁵De ná cútahvī ō nūū Yāa Dios, chi nī jēhe yā Sēhe yā nūū ō, jā cúu iin táhvī cāhnú ndasí jā má quendá cuitī ō cachī tūhun ó ndihi.

Jā ndíso tínú Pablo jā cúu dē apóstol

10 ¹De nduhū Pablo, cáhān ndāhvī nī jíin ndá nú jíin modo jā cáhān maá Cristo jā vitá inī yā de vāha inī yā. Nduhū, chi cáhān ndá nú jā tá íyó nī jíin nú de íyó suchí inī nī nūū nū, sochi tá íyó jícá nī de nduú yúhú cuitī nī cāhān nīhīn nī jíin nú. Cáchī ndá nú.

²Túsaá de cáhān ndāhvī nī jíin ndá nú jā tá cuēē nī de mā cáhān nū tūhun jā sáhá jā cuxeēn nī nūū nū. Chi sava ndá nú cáhān jā sáhá ndá nī tiñu yā jā maá-ni jā níhīn nī sīquī ñúcuán. Túsaá de íyó tūha nī jā cuxeēn nī nūū nchivī jā cáhān súcuan.

³Chi vísō cúu ndá nī nchivī jā ndéē inī ñayiví, de nduú cánāá nī tá cúu nūū cánāá nchivī ñayiví. Chi modo jā cánāá nī cúu jā cánāá nī sīquī ndācá tiñu néhén.

⁴Chi nsūú ndatíñú ñayiví jétíñú nī jā cánāá nī, chi jíín poder Yāa Dios cúu jā cánāá nī jā snāá nī ndācá fuerza jā cúu contra sīquī yā.

⁵Súcuán snāá ndá nī ndācá tūhun nduxí jíín tūhun téyíí jā ndúcú casī jā má cūnī nchivī nāsa Yāa cúu Yāa Dios. De jāsī nī nūū ndihi jāá nduú vāha jā jāni cāhá inī nchivī, tácuā candíja jī nūū Cristo.

⁶De tá jīnu jā candíja vāha ndá máá nú, sá de coo tūha nī jā cuāha nī castigo nūū ndá cā nchivī jāá nduú cūnī candíja.

⁷Ndá máá nú chi maá-nī jā jāni inī nū modo nchivī jāá nduú jícūhun inī. Chi tú nā-nī tēe jāni inī dē jā Cristo nī ntetíñú yā dē, de ná sáhá dē cuenta jā suni súcuán nī ntetíñú yā ndá nduhū.

⁸De tú nī ncāhān téyíí nī jíín nú jā ndíso tíñú nī, sochi nduú cúcanoō nī sáhá. Chi maá Jētohō ō nī ntetíñú yā ndá nī, tácuā sáhá nī jā cuja ánō ndá nú jíín tūhun yā, de nsūú jā snāá nī.

⁹Túsaá de nduú cūnī nī jā canī inī nū jā ndúcú nī siúhú nī ndá nú jíín carta nī.

¹⁰Chi cāhān sava nú jā ndācá carta nī chi sndíhvī ndasí inī, de nīhin ndācu tiñu, sochi tá íyó nī jíín ndá nú de nduú cūndeé inī nī jā ndacu nīhin nī, de suni nduú cúu cāhān viī nī, cáchi ndá nú.

¹¹De nchivī jā cāhān súcuán ná sáhá jī cuenta jā tá cúu nūū nīhin cāhān carta nī tá íyó jícá nī, suni súcuán nīhin ndacu nī tiñu nūū nū tá coo nī jíín nú.

¹²De va mā chūndeé cuitī inī nī jā sáhá ñáhnú nī maá nī tá cúu nūū sáhá sava tēe ñúcuán jā jétúhún dē maá dē. Ndá tēe ñúcuán chi íyó naā xīnī dē jā jāni inī dē jā cúñáhnú cā dē nsūú cā ndá táhán dē, de nduú sáhá dē cuenta nāsa íyó dē nūū Yāa Dios.

¹³Sochi ndá nduhū chi nduú cútéyíí nī, chi maá-nī medida tiñu jā ní jēhe Yāa Dios nūū nī, de mā scāa cā nī. Maá Yāa Dios nī jēhe medida nāsaa cúu jā sáhá nī, de maá yā nī jēhe tūhun jā ní jīnū nī nūū ndá ndóhó nchivī Corinto.

¹⁴Jā ñúcuán, tá nī jīnū ndá nī nūū nū jā xíhna ñúhún de nsūú jā ní nchāha nī nūū medida tiñu jā ní jēhe yā nūū nī. Chi xihna cā ndá máá nī nī jīnū nūū ndá nú jā ní nacani nī tūhun vāha Cristo.

¹⁵De nduú cútéyíí nī sīquī tiñu jā ní nsāhá incā tēe, chi vāchi sīquī tiñu jā ní nsāhá maá nī-nī. De sa ñúhún inī ndá nī jā cuāhā cā candíja nú, de súcuán de cuu sáhá nī cuāhā cā tiñu yā māhñú ndá nú, sochi maá-nī medida jā ní jēhe yā.

¹⁶De sá de quihĩn ni nũ ndá cā ñuũ jā íyó ichi nú cā ñuũ nũ, jā scútē nuu cā ni tũhun jā scácu yā yóhó cúnĩ ni. Sochi mā quĩvi nduũ ni jā cutéyíi ni nũ ja ni nacani incā tē tũhun.

¹⁷De tú ní tē cúnĩ dē cutéyíi dē, ná cutéyíi dē sīquĩ jā sáhá maá Jētohō ō, nsūú sīquĩ jā sáhá maá dē.

¹⁸Chi nsūú tē jā jétúhún maá cúu jā quéndōo yíñúhún, chi sa tē jā jétúhún maá yā.

Jā cāhān Pablo sīquĩ ndá tē jā nācani tũhun stáhvĩ

11 ¹Cune cáhnú inĩ ndá nú de ná cāhān ni jacū tũhun modo tá cāhān nchivĩ naā. Túsaá de cáhnú coo inĩ ndá nú vii.

²Chi cúcuíñú nĩ jā jéhē ndá nú, tá cúu nũ cúcuíñú Yāā Dios. Chi cúu ndá nú tá cúu iin ñahan lúlĩ jā íyó ndoo, de nĩ nsāhá nĩ jā quetáhán ndá nú jín Cristo, tá cúu nũ quetáhán iin ñahan lúlĩ jín mátúhún-ni yíi ji.

³Sochi yúhú nĩ jā sanaā de cuāha ndá nú tũhun jā ndá tē nācani incā tũhun, stáhvĩ dē ndá nú, de siāā nũ tũhun jā chíñúhún ndāā nũ Cristo jondē jín inĩ jín ánō nũ. Chi suni súcuan nĩ nsāhá Satanás jín Eva, chi nĩ nquĩvi inĩ iin cōō, de nĩ stáhvĩ ji ña jín tũhun ndíchĩ jā stáhvĩ.

⁴Chi tá quĩji ndá tē nũ nũ de tú nduú nācani ndāā dē tũhun Jesús tá cúu nũ ní nacani ndá nĩ, de va vāha ndasí jétáhvĩ ndá nú dē. De suni súcuan vāha jétáhvĩ nú nũ incā espíritu jín nũ incā tũhun jāā nduú quetáhán jín Espíritu Santo jín tũhun jā ní ncandíja nú jā scácu yā ndá nú.

⁵De ndá tē ñúcuán jā cándíja ndá nú jā cāhān dē jā cúu dē apóstol cúñáhnú, sochi nduú cúñáhnú cuitĩ dē nũ ni.

⁶Chi vísō sanaā de nduú níhĩn vāha nĩ modo jā cāhān ni, sochi jícūhun vāha inĩ ni. Chi jín ndihi tiñu jā ní nsāhá nĩ mähñú ndá nú nĩ stéhēn cāji nĩ jā súcuan cúu.

⁷Nduú ní jícān ni xūhún nũ ndá nú jā ní nacani nĩ tũhun jā scácu yā yóhó. De súcuan nĩ ntecū ndāhvĩ nĩ tácu quendōo vāha cā ndá nú jín tũhun yā. ¿De va cuāchi nĩ nsāhá nĩ jā ní nsāhá nĩ súcuan, á naá cúu?

⁸Chi sava cā grupo nchivĩ cándíja nĩ nquehen nĩ xūhún jā ní jēhe ji nũ ni, tácu súcuan-ni nacani nĩ tũhun yā nũ ndá nú.

⁹De tá nĩ iyo nĩ jín nú de nĩ ndihi xūhún nĩ, de nduú ní jícān cuitĩ ni nũ ni iin nú. Chi ndá hermano jā ní nquiji ichi Macedonia nĩ jēhe dē nũ ni jā cúmanĩ. De jín súcuan de nduú ní stāhān ni ndá ndóhó, de ni mā sáhá cuitĩ ni.

¹⁰De tá cúu nũ cúcáhnú vāha inĩ ni jā jínĩ ni tũhun ndāā Cristo, suni súcuan jínĩ ni jā má quēhén nĩ xūhún nũ ni iin nchivĩ ní región Acaya, tácu mā cāsĩ ji jā cúsiĩ inĩ ni jā súcuan-ni nācani nĩ tũhun yā.

11 ¿De á sīquī jāá nduú mānī ni jín ndá nú cúu jā cáhān ni sūcuán, jáni inī nū? Nduú chi maá Yāā Dios jínī yā jā mānī ni jín ndá nú.

12 De sáhá cā ni tá-ni sáhá nī, chi mā quēhén nī xūhún nú, tácuā casī ni jā sáhá téyíí ndá tēe nūcuán maá dē jā cáhān dē jā inuú-ni sáhá dē tiñu yā jín nī.

13 De ndá tēe nūcuán chi nsūú apóstol ndāā cúu dē, chi cúsa maá tūhun stáhvi-ni cáhān dē, de sáhá dē maá dē jā cúu dē apóstol Cristo.

14 De nduú sáhvi inī ō jínī ō jā sáhá ndá dē sūcuán, chi ja jínī ō jā suni Satanás násāma maá, de stáhvi jā sáhá maá modo iin ángel Yāā Dios jā jíca jín luz yā.

15 De jā nūcuán suni nduú sáhvi inī ō jínī ō ndá tēe jā jétíñú Satanás, tú sáhá dē maá dē jā tēe sáhá ndāā cúu dē. De iin quívi de nanihīn dē sīquī tiñu néhén jā sáhá dē.

Tūndóhó jā ní ndoho Pablo sīquī jā cúu dē apóstol

16 Incā vuelta cáhān ni jín ndá nú jā ni iin nú mā cānī inī nū jā tēe naā cúu nī. Sochi tú sūcuán jáni inī ndá nú, de va cuetáhvi nú jā cáhān ni modo tēe naā túsaá, de sūcuán de va suni maá nī cuu cutéyíí nī jacū tá cúu nū sáhá ndá tēe nūcuán túsaá.

17 Jā cáhān ni sūcuán chi nsūú jā ní ncachī maá Jētohō ō jā cáhān ni, chi sa modo tēe naā cáhān ni jā cutéyíí nī.

18 Chi cuāhā dē sáhá téyíí dē maá dē jā cúu cuenta ñayiví, de va suni sūcuán ná sáhá téyíí nī maá nī túsaá.

19 De va tēe íyó cájí xīnī cúu ndá nú, jáni inī nū, de jā nūcuán vāha jéndeé inī nū ndá tēe naā xīnī túsaá.

20 Chi va vāha-ni jéndeé inī ndá nú nū ndá tēe nūcuán jā sáhá fuerza dē ndá nú jā satíñú cāhá nú nū dē, á sáhá ndáhvi dē ndá nú, á cāndeé dē ndatíñú nú, á sáhá ñáhnú dē maá dē nū nū, á jondē cátū dē nū nū.

21 De va vísō cúcanoō ni jā cachī ni, de ná cáchī ni jā maá nī va nduú nā valor ni jā sáhá téyíí nī maá nī tá cúu nū sáhá ndá tēe nūcuán. Sochi mitan de tú íyó sava tēe jā chūndeé inī dē sáhá téyíí dē maá dē, de va suni chūndeé inī maá nī túsaá. De va cáhān ni tá cúu nū cáhān iin tēe naā.

22 Tú cutéyíí ndá dē jā tēe hebreo cúu dē, de saá-ni nduhū. Tú tēe Israel cúu dē, de saá-ni nduhū. Tú tatā Abraham cúu dē, de saá-ni nduhū.

23 De va cáhān ni tá cúu nū cáhān tēe naā jā cutéyíí nī sūcuán túsaá. Tú tēe sátíñú nū Cristo cúu dē, de víhí cā nduhū. Chi cuāhā cā tiñu sáhá nī nsūú cā ndá máá dē, de cuāhā cā vuelta nī ncani nchivī nduhū, de cuāhā cā vuelta nī nchihī nī vecāa, de suni cuāhā vuelta ja ñatin cuū ni.

24 Chi ndá táhān nī tēe hebreo ūhūn vuelta nī ncani ndasí dē nduhū jíin cuarta ñii, iin medida jā ja ñatin cuū ni sáhá.

²⁵Unī vuelta nī ncani ndá dē nduhū ntuxíi, de iin vuelta nī ncuun ndá dē yūū xīnī nī. Unī vuelta nī nquēe barco jā ní jica nī sīquī tūhun yā. Iin űūú jíin iin nduú nī nchosō teni nī nūū cūnú ndute mar.

²⁶Cuāhā vuelta nī ndoho nī jā jíca nī ichi, de nī ncācu nī nūū ndācá yūte, de nī ncācu nī nūū ndācá jācuīhná. Nī ncācu nī nūū nchivī nación nī jíin nūū nchivī űūū jíca. Nī ncācu nī cháhá chúcuán tá nī iyo nī űūū jíin rancho jíin mar. Nī ncācu nī nūū ndá táhán nī jāá nduú íyó ndāā.

²⁷Nī nsatíñú nīhin nī de vījín nī ndoho nī. Cuāhā vuelta nī jahnī nī maá nī māhná. Nī jīhī nī sōco, nī nchīchī nī ndute. Cuāhā vuelta nī iyo nditē inī nī, nī ncuitūn nī, nī ncumanī sahma nī.

²⁸De sīquī ndācá jā yáhá chi íyó cā. Chi ndiquivī ndóho nī jā nācani ndasí inī nī jēhē ndá grupo nchivī cándíja.

²⁹Tú iin nchivī nduú fuerza inī ji, de suni súcuán ndóho nī jíin ji. De tú iin nchivī quívi ji cuāchi sáhá táhán ji, de ndóho nī tūhun canoō jíin tūhun quítī inī.

³⁰Tú súcuán de tú cánuú jā cutéyíi nī, de va cutéyíi nī sīquī ndācá jā stéhēn jāá nduú nā fuerza inī nī.

³¹De Yāā Dios, Yāā cúu Tatá maá Jētohō ō Jesucristo, jínī yā jā cáhān ndāā nī. De níi cání ná cáhān nchivī jā vāha ndasí Yāā cúu yā.

³²Tá nī iyo nī űūū Damasco, de gobernador jā ndācu tiñu inī región jā tíin rey Aretas, nī jani dē ndá soldado nī jito vāha dē ndá viéhé pared jā ní jicó ndūū űūū űúcuán, chi tiin dē nduhū jā quíhīn nī vecāa nícu.

³³De nī nquivī nī inī iin tīcá, de nchivī cándíja nī ntavā ji nduhū ventana iin vehe jā íyó yīcā pared, chi nī snúu ji nduhū inī tīcá. De súcuán nī ncācu nī nūū tēe űúcuán.

Jā ní iyo iin jā ní stéhēn nūū Pablo jā ní stúu yā nūū dē

12 ¹De nduú níhīn tiñú jā cutéyíi nī. De vāha cā ná cáchī tūhun nī nūū nū sīquī iin jā ní stéhēn maá Jētohō ō chi nī stúu yā nūū nī.

²Jínī nī iin tēe jā cándíja Cristo, de ja nī ncuu űxī cūmī cuīyā jā ní nsāhá yā jā ní ncaa tēe űúcuán nī jēhēn dē jondē andiví űnī. De nduú jínī nī á nī jēhēn nī jíin yiqui cúñu nī, á nī jēhēn ánō ni-nī. Maá Yāā Dios cúu jā jínī.

³Sochi jínī nī jā ní ncanee yā nduhū. De á nī jēhēn nī jíin yiqui cúñu nī, á nī ndōo, nduú jínī nī, chi maá-ni Yāā Dios cúu jā jínī.

⁴Chi nī nsāhá yā jā ní ncaa nī nī jēhēn nī jondē andiví nūū viī ndasí cáá. De ichi űúcuán nī jini nī ndācá tūhun yuhū ndasí jā má cūú cachī tūhun yóhó nchivī.

⁵De sīquī jā ní nsāhá yā súcuán jíin nī cúu jā cutéyíi nī, sochi sīquī maá nī chi mā cutéyíi nī. Chi cutéyíi nī maá-ni sīquī jāá nduú nā fuerza inī nī.

⁶De tú cúnī nī cutéyíí nī sīquī maá nī nīcu, de nsūú jā naā xīnī nī de tú sāhá nī súcuán nīcu, chi ndāā jā íyó iin jā cuu cutéyíí nī. Sochi mā sāhá nī, chi nduú cúnī nī jā canī inī nchivī jā cúñáhnú cā nī nsūú cā jā ní jīnī jī á jā ní jīnī jī jā cáhān nī.

⁷De nduú cúnī yā jā yāha jā cutéyíí nī sīquī jā ní stéhēn nijin yā tiñu ñáhnú ndasí ñúcuán nū nī, de jā ñúcuán nī nquiji iin tūndóhó jā níquīn nduhū de sndóho nduhū. De iin jā ní jēhe yā tūhun jā tetíñú Satanás cúu, iin jā sndóho nduhū, tácuā mā yāha jā cutéyíí nī.

⁸De ūnī vuelta nī ncāhān ndāhvī nī jín maá Jētohō ō jā sāhá jíyo yā quihīn.

⁹Sochi nī ncāhān yā jín nī: Nduú chi nduú cúmanī jā cúndáhvī inī nī ndóhó. Chi tá nduú fuerza vāha iin nchivī, de sáhá nī jā ndúcuahā cā fuerza maá nī inī jī, ncachī yā. Túsaá de cúsiī inī nī jāá nduú fuerza vāha nī, chi súcuán ndúcuahā cā fuerza Cristo inī nī.

¹⁰Jā ñúcuán cúu jā cúsiī inī nī jāá nduú fuerza vāha nī, jín jā cáhān nāvāha nchivī nū nī, jín jā cúmanī nū nī, jín jā jīnī ūhvī jī nduhū, jín jā ndóho nī tūndóhó jā sīquī Cristo. Chi jāá nduú fuerza vāha maá nī, ñúcuán sáhá jā níhīn nī fuerza maá yā.

Jā nācanī inī Pablo sīquī nchivī cándíja ñuū Corinto

¹¹De va tēe naā cúu nī jā ní nsāhá téyíí nī maá nī túsaá. De sīquī jāá nduú cándíja ndá nú nduhū, jā ñúcuán cúu jā sáhá nī súcuán. Chi sa cánuú jā cuetúhún ndá nú nduhū nīcu. Chi vísō nduú tiñu cuitī nī jā maá nī, sochi va nduú núu cuitī nī nū ndācā tēe ñúcuán jā cáhān ndá nú jā apóstol cúñáhnú cúu dē.

¹²Chi māhñú ndá nú nī nsāhá nī ndācā tiñu jā stéhēn jā cúu ndija nī apóstol. Chi jín cuāhā paciencia nī nsāhá nī ndācā tiñu ñáhnú jā stéhēn poder Yāā Dios, jín ndācā tiñu jā ní nsāhvi inī nū nī jīnī nū.

¹³De nduú ní nsāhá nī ndá ndóhó jā coo núu nú nū ndá cā grupo nchivī cándíja, chi mátúhún-nī jāá nduú ní jēhe nī tūhun jā taji nú jā jīnī ñúhún nī, ñúcuán-nī cúu jā ní nsāhá nī. Túsaá de cune cáhnú inī ndá nú tú súcuán nī nsāhá nī falta nū nū.

¹⁴De mitan de ja íyó tūha nī jā cuéndēhé nī ndá nú vuelta ūnī. De suni nduú nā cuá cācān nī nū nū, chi nsūú ndatíñú nú cúu jā cúnī nī, chi sa jā ná quéndōo vāha nú jín tūhun yā. Chi cúu ndá nú tá cúu sēhe nī, de sēhe chi nduú cánuú scáyā jī jā cuu tatá jī, chi sa tatá cánuú jā cuāha dē jā jīnī ñúhún sēhe dē.

¹⁵Jā ñúcuán cúsiī inī nī jā cāxīn nī jā névāha nī, de jondē sndíhi nī fuerza maá nī, tácuā sáhá nī jā quéndōo vāha ánō ndá nú. De mānī cā coo nī jín nú, vísō sanaā de jacū-nī íyó mānī ndá nú jín nī.

¹⁶De íyó jacū nū jā cáhān jā vísō nduú nā cuá ní jícān ni nūū nū, sochi tēe stáhvī cúu nī, chi nī nducú nī modo ndīchí jā nīhīn ni xūhún nú, cáhān ndá nú. De nduú.

¹⁷¿A ndá tēe jā ní ntají nī nūū nū, á íyó iin dē jā ní stáhvī dē ndá ndóhó jā nīhīn dē xūhún nú cuu maá nī? Nduú cuitī.

¹⁸Nī ncāhān ndāhvī nī jín Tito jā cuéndēhé dē ndá nú, de nī ntají nī incā hermano nī jēē jín dē. ¿De á nī stáhvī Tito nī nquehen dē xūhún nūū nū jā cuu maá dē, á naá cúu? Nduú, chi inuú-ni sáhá ndúū ni, chi iin-ni ánō ndúū ni.

¹⁹A sanaā de jáni inī ndá nú jā cáhān ni tūhun yáhá tácuca canī inī nū jā vāha tēe cúu nī. Nsūú súcuán cúu, chi Yāā Dios jín yā jā cáhān ni maá-ni tūhun jā cúnī Cristo. De ndihi jā cáhān ni chi ndúcú nī jā cuja nú jín tūhun yā, ñanī mánī.

²⁰Chi yúhú nī jā tá cuēē ni nūū nū, de sanaā de cunī ni jāá nduú sáhá ndá nú tiñu jā jétahān inī ni. De ndá máá nú suni mā quétahān inī nū nduhū. Chi sanaā de cánāá ndá nú, cúcuásún inī nū, quítī inī nū, cúnduxí nú, sátúhún nú, cáhān nū sīquī táhān nú, cútéyí nú, jíca nēhén nú.

²¹De yúhú nī jā tá cuēē tucu nī de cuāha Yāā Dios tūhun canoō nūū ni jā súcuán sáhá ndá nú. De sanaā de cucuécá inī ni tú íyó cuāhā nū jā ní nsāhá cuāchi ichi chátā, de nduú nācanī inī nū jā sndóo nú tiñu téhén, jín tiñu jíca ndiī, jín tiñu nēhén ndasí jā ní nsāhá ndá nú.

Saludo jín tūhun jā cáchi tūhun Pablo jā sándihí

13 ¹Yáhá cúu vuelta ūnī jā cuéndēhé nī ndá nú. De sáhá ndāā ō tiñu tá cúu nūū cáhān tutū: Jín tūhun jā cáhān ūū á ūnī testigo de cundaā ndācá tiñu, cáchi.

²De mitan jā íyó jícá nī de cáhān tucu nī tá cúu nūū ní ncāhān ni tá nī iyo nī jín nú. Cáhān ni nūū ndá nchivī jā ní nsāhá cuāchi ichi chátā, jín nūū ndihi nú, jā tá cuēē tucu nī de mā cōó vitá inī ni jín ndá nú.

³De ñúcuán cuu prueba jā ndúcú ndá nú tú jāndāā jā cáhān ni jín fuerza Cristo. Chi Cristo nduú cúmanī fuerza yā jā sáhá ndāā yā jín ndá nú, chi stéhēn yā poder yā mähñú nú.

⁴Chi vísō nduú ní stéhēn yā fuerza yā tá nī jihī yā yīcā cruz, sochi mitan chi técu yā jín poder Yāā Dios. De tá cúu nūū ní ndoho maá yā, suni súcuán ndóho ndá nī mitan jāá nduú fuerza ni. De vísō súcuán de jín poder Yāā Dios de técu ndá nī jín yā jā sátínú nī nūū nū jā sīquī tūhun yā.

⁵Coto túnī ndá nú maá nú tú íñī nīhīn nú jín tūhun cándíja nú yā. Sáhá vāha nú cuenta. ¿De á nduú jínī ndá nú jā ndēē Jesucristo inī ánō nū, de tú ndāā jā ní ncandíja ndija nú?

⁶De ñúhún inī ni jā suni cúcáhnú inī ndá nú jā cándíja ndija ndá máá nī.

⁷De jícān táhvī ndá nī nūū Yāā Dios jā má sāhá ndá nú ni iin tiñu néhén. De vísō cuetúhún ndá nú jā vāha ndácu nī nūū nū, á vísō mā cuetúhún nú, de nduú nā cuá sāhá, chi maá-ni jā sāhá nú tiñu ndāā cúu jā ndúcú nī.

⁸Chi nduú jāsī nī nūū tiñu ndāā, chi sa scāca nī.

⁹Túsaá de cúsiī inī ndá nī de tú nduú nā fuerza maá nī, de tú íyó fuerza maá nú. De níní jícān táhvī nī jā ná cúja cā inī ndá nú jín tūhun yā.

¹⁰De téē nī carta yáhā nūū nū jondē ncháha ca cuēē nī, tácuā tá cuēē nī de nduú cā jíní ñúhún jā cuxeēn nī nūū nū. Chi nī jēhe Jētohō ō tiñu yáhā jā ndíso nī tácuā sāhá nī jā cuja ánō ndá nú jín tūhun yā, nsūú jā snāā nī.

¹¹Ja nī ncāhān ō túsaá hermano, de ná cóo jā váha jín ndá nú. De cundihví inī nū jā cuja nú jín tūhun yā, de coo ndeé inī nū. De coo inuú inī nū de cundeē mānī nū jín táhán nú. De Yāā jā ndíso tūhun ndeé tūhun sī inī jín tūhun cúndáhvī inī, coo yā jín ndá nú.

¹²De tá cáhān jítáhán ndá nú, de yíñúhún techuhú nú ndahá ndá ji.

¹³Sāhá ndeé inī ndá nú, cáchī ndá hermano cándíja jā íyó yáhā.

¹⁴De ñúhún inī ni jā Jētohō ō Jesucristo ná sáhā cā yā jā váha ndá nú, de Yāā Dios cundáhvī inī yā ndá nú, de Espíritu Santo coo cáhnú yā jín nú. Súcuán ná cóo. Amén.